

Das ist / mit der Juden verstandt / haben. Ist
gut zu rechen / wo zu ich wehlen würde / ich
liesse die Juden mit irem verstand vnd buch-
staben zum Teuffel faren / vnd füre mit S.
Augustin verstand / on ire buchstaben zum
Himmel. Denn ob Augustinus nicht kan / wie
die Juden / sagen Kikalon / da er cucurbita sa-
get / Ione. 3. Item nicht kan sagen / venient
Demdath / da er veniet Desideratus sagt /
Dagga. 2. vnd dergleichen viel / so bricht da-
mit sein glanbe nicht den Hals / noch Bein /
weil er den rechten man kennet / der da heisse
Weg / Wahrheit / vnd Leben / Von welchem
die Propheten weissagen vnd zeugen / wie ge-
sagt.

Widerumb die Juden / weil sie diesen
Christum nicht annemen / können sie nicht
wissen / noch verstehen / was Moses / die Pro-
pheten vnd Psalmen sagen / was rechter glau-
be ist / was die Zehen gebot wollen / was die
Exempel vnd Historien leren vnd geben / son-
dern die schrift mus inen sein (nach Isaias
29. weissagung) wie ein brieff / dem der nicht
lesen kan. Welcher sibet die buchstaben seer
wol / weis aber nicht was sie geben / wie das
Dentsch sprichwort sagt / Ein weis feld /
darin ist schwarzze saat / Manch man für v-
ber gahet / der nicht weis was da stat. Wer
aber des lesens leufftig vnd fertig ist / der leufft
vber hin / fasset den synn / vngeacht / ob er etz-
liche